

ITIONCAQUECA

SANTIAGO

Antsatantaquemparoca

Ocatica iroguenti antsatantaquemparoca itioncaqueca Santiago itioncaciaquenerigueti ishiraerijia tsarotentajiacarica Jesoshi oaguetananquitsica quepatsipaequi. Iriraquea Santiago irio jorio iriguentijeguite Jesoshi. Iquenquejajitaque itioncaquero ocatica paperi ajagantsiniqui irooca 40, irooca otsipaqi ajagantsini arejevaetacaro ajagantsini 60. Itsipajia iquenquejajiaque itioncaquero tequeratagueti intioncajiteroji otsipapae paperi choocajianquitsica ocaniqui paperiqui icantajitica *Tsavetacoquerica Jesoquirishito*, arica ajagantsiniqui 40, irooca otsipaqi ajagantsini arejevaetaro ajagantsini 50.

Acaniqui paperiqui icantajiaqueri quemisantajiaquerica Jesoshi intampishitashijiaqueroja yatsipeventajiacarigueti (1.2-4, 12-18). Itsatacajiaqueri cameetsaguetsica irantajigueca quemisantajiaquerica Jesoshi (1.5-11, 19-27; 2.14-26; 3.13-18; 5.7-20) aisa taa opajita teeca oncameetsateji irantajiaquerogeti (2.1-13; 3.1-12; 4.1-17; 5.1-6).

Iquenquetsatacajiaqueri irira joriojia quemisantajiaatsica

1 ¹Naroguenti Santiago tioncaciaquempiroca oca, naroguenti savicaventiroca inintaguetica Aapani Irioshi aisa Amajirote Jesoquirishito. Imaica nonintaque nontioncaciaquempi maasano aviatimpajia oaguetananquitsica quepatsipaequi, aviguentijia ichoviquijiaqueca irijanitepae Ishiraerini carajianquitsica 12.^a

Intampishitashijiaqueroqueate maasano irantsipejiaquempaca

²Napiguemisantarijiateni, pantsipejiaquempaguete taaca opajitapae pishinejiaquempaqueate. ³Pitsajiaquetarite aatoguete piquemisantajiguiro patsipejiacaca irosati pamananaqueri Aapani Irioshi, ariqueate pintampishitashijianaquero pincoguitempani. ⁴Cotanquitsiquea irosati pintampishitashimajianaqueroja cameetsanijite pinquenquejajajiaqueronijite ora taaca opajitapae

a 1.1 Icanquegueti ocaniqui *oaguetananquitsica quepatsipaequi*, icantacojiaqueri quemisantajiaquerica Quirishito, yamenaqueriquea yoaguetanaquequea guinteninintsipaequi quejetaca iporocajianaque coramani ishiraerijia icatsimajiaqueriguete Ashiriaquitica aisa Vavironiaquitica.

cameetsaguetatsica aisa cameetsanijite pincomajamajajianaquempaniji, pagavejajianaquenijite pintsamajajianaquero inintaguequeca Aapani Irioshi, aatoniji oquempevaetacaguimpi taaca opajitapae quempevaetacaantatsica.

⁵Choocagueti oraniqui tequerataca intsamajajiguero ininqueca Aapani Irioshi iramanajiaqueriqueate incantajiaqueri intsatacaimentajiaquerinijite. Iriatimpa inquemajiaqueri, igantagatarite iquemiri amanajiguirica ariqueate itsatacaamajajiaqueri, teequea incanteji: “¿Quero ocotaca pamanantaquenaca?”

⁶Cotanquitsi quericaca cantaquerineca Aapani Irioshi intsatacaqueri intsamajataquequeate arimaja intsatacaqueri, aatoqueate incantajigui: “Aricampa aatoca iquemana, aatocajate itsatacagana.” Maasanotarite quejejiatsica imaica mana iquejejiacaro otamacojatiguetei quentija itampijatiguetei choviga, ariqueate ojaquiti von von, yoguipigui-pijaatanaqueoqueate. ⁷⁻⁸¿Arimpate inquemaqueri Aapani Irioshi irica quejetiroca imaica? Aatoquea iquemiri, teenicate apaniro oneji iquenquejamajataqueca manaqueate iroota icanti iroota icanti. Ari oquejetaca aisa yantaguevetacaca teenica intsateji quero incoquempa.

⁹Cameetsavaetaquequeate irishinejiacquempaguetei irirajia apiguemisantarijia-teni teeca iranaantajigueji, ipejaiaqueritarite Aapani Irioshi irijanijiate.

¹⁰Iriaqueate apiguemisantarijiateni ajaarantajatsica cameetsavaetaquequeate irishinejiacquempaquate intsatacaajiaqueriguetei Aapani Irioshi aatonijite yaventacojajaro yashintajiacaca, manatarite iquejejiacaro ovempe-naqui teeca onquishopempenaquiteji, tee osamani onchoocateji. ¹¹Arimpate iroatimpa arimpaguetei icatsirincaguitemajjatiguetei catsirincateri icatsirincata-

naqueroguetei ariqueate jac oshimpeguicarianaquequeate opariapempenaquitanaque teequeate oncameetsapempenaquitanajeji. Ariqueate iquejejiaca ajaarantajatsica aatoqueate osamani ichoocajiguetsi, manaqueate taampina irimetojajianaque irovashiantaguetanaqueroqueate maasano isavicaventave-caca.

¹²Quericaca teeca inquemisantajeroji yatsipeguetacaca mana arimpaqueate itampishitashitanaquero ariqueate icavintsajamajataqueri Aapani Irioshi, yamenaqueritarite itampishitashiquero tee inquemisantero. Ariqueate intanco-rejajeriqueate, aatoquea imetojajitsi. Ariqueate inquejetacaajiaquempari maasano pintsamajajigarica, irinetsanaquero icanqueca iroaqueraquetei.

¹³Choocaguetei quenquejanquitsica irante teeca oncameetsateji aatoqueate icanti: “Iriguentei quenquejacaquenaro Aapani Irioshi.” Iriaqueate Aapani Irioshi teenicate irinintenicate irantaquero teeca oncameetsateji, aisa teequeate inquenquejacaaneroji yantaguishejiguica. ¹⁴Inchiquiojitarite iquenquejashitacaro iriatimpa inintaquequeate irantaquero covaegui-shetatsica. Irooqueate agavejaquerine inintaguisshetaqueca. ¹⁵Iroquetiqueate ocoraquetashiqueri iquenquejaquero, coajica inintamajaqueroquetei ariqueate yantaquero. Oraqueate yantaqueroquetei irooqueate onquenantanaquempa iroantanaquempaca camorecariqui.

¹⁶Napiguemisantarijiateni nopintamajajiacaca, aatoqueate avisatiqueate amatavijaijaatsi. ¹⁷Aapani Irioshi icavintsajamajajiacajiqueate irootaquequeate maasano cameetsaguetatsica irioqueate jocajiacajiro. Iriatimpa iriguentei peacaaguetaarica taai aisa impoquiro jeri aisa catsirincateri savincaguitematocantatsica. Teequeate

incantashitatiguempaji, irosati icocani icavintsajantamajati. ¹⁸Irijanintajiacaji, inchiquiojitarite inintaque iriatimpa. Irootaquetari choocatacaacaji Quenquetsarentsimajaca. Aatimpajia aroguentijia aroquetica irijanintajiacaca ajivatimentajiaquerinijite maasano irijanintajiaquempaca.

**Quero incojiaquempani
inquemisantamajiaquegueti**

¹⁹Imaica, napiguemisantarijatiene nopintsajigaca, pintsajivaquero oca: cameetsataque taampina anquemavaquero icancajica itsipa, aatoquea aquenquetsatacagui ri taampina tequera tagueti anquenquejamajateji querocaca ancateri, aisa aatoquea taampina acatsimati. ²⁰Ancatsimajiaavetaquempagueti aatotari agaveji anetsanatero inintaguetica Aapani Irioshi, aato agaveji ancomajamajaquempa. ²¹Irootaqueate nocantantajiaquempica povashiantajianajero maasano piquenquejaguishejiguica, aisa taaca opajitapae pantaguishejiguica teeca oncameetsateji. Aato paventacojiga manaqueate pinquenquejamajiaquero Iguenquetsatsare Aapani Irioshi itsatacaajiaquempica, irootarite meshiajjajimpi. ²²Aatoqueate piquemashitaro intati manaqueate pinquemisantamajiaquero quero ocanqueni ariquiteate pincojiaquempani. Oraqueate managueti pinquemashijiaquemparo intati avisatiqueteate amatavijiajaatsi. ²³Querica quemashitaroca Iguenquetsatsare Aapani Irioshi, aatogueti iquemisantiro ocantaqueca iquejetacari amenavorovetsica amenajarontsiqui. ²⁴Yamenajavetaca quero icocani, iroompaqueate yoanajatigui jac ipeacotajaro. ²⁵Oraqueate Iguenquetsatsare Aapani Irioshi caaviji ocameetsamajataque, ovashiantacajiaacajiro-

queate teeca oncameetsateji antaguishejiavetacaca. Irooqueate meshiajjiacajica, cotanquitsi Aapani Irioshi incavintsajamajataqueri quericaca teeca impeacotemparoji queroca ocanqueca, mana inquemisantamajatanaqueoqueate, aisa intsamajaqueroqueate ocantaqueca.

²⁶Chooa cantatsica: “Narogueti quemisantatsica”, cotanquitsi tee irampavirajero inene. Iriiraqueate quejearica imaica teequeate arimaja inquemisantamajatero icanqueca Aapani Irioshi, irisatiqueteate amatavijajatsi. ²⁷Iriiraqueate yamenaqueca Aapani Irioshi arimaja irigueti iquemisantamajataque irioqueate cavintsajiaquerica chaajaniquipaetica metojacoguetsica aisa manquigarentsijia metojacoguetsica atsipejianquitsica, aisa inetsanajiaa aatoniji opantari quempevaerentsi ipeacaapinijiacaca quepatsiquitica.

Ampintsajiaquempani maasano

2 ¹Napiguemisantarijatiene, imaica piquemisantajiaquerigueti Amajirote Jesoquirishito oganejencamajata-tsica, aatoquea apaniro irigueti pishineventajiga irira anaantaguetanquitsica, irioqueate pimanintajiaque teeca iranaanteji. Maasanoqueate pishineventajiaquempani, iriogueti anaantanquitsica irisati teeca iranaanteji. ²Arigueti picapiocajiaa ariquiteate inquijajiajojaquegueti mavite caquinte, apaniro irigueti netsanatacovaetaqueate aisa yasatecacari ichapaquiqui imaachapaquijitaca ipeacaajicaca cavorejatatsica vegaramajatanquitsica, iriraqueate itsipa tsoncashitequijacotaca; ³⁻⁴iriguentigueti paajivaque netsanatacotanquitsica pinetsanajivaqueri poguisavicajivaqueri, iriraqueate teeca irinetsanatempani manaqueate pogatiavaqueri intati irooca poguisavicajivaqueri intati querocagueti, çarimajampate

aviguentijia quemisantamajajiatsica? Teequeate, teenicate pincavintsajajigueriji teeca irinetsanajiguempaji, iriguentitarite pishineventajiaca netsanatacojianquitsica. Teequeate pinetsanajigueroji piquenquejajiaqueca, iroguenti piquenquejajiaque teeca oncameetsateji.

⁵Napiguemisantarijiateni nopintsamajajiaca, iintsija pinquemisantajiguena nontantajiaquempica. Aapani Irioshi icoguiajiaqueri teeca irashintamajajiguempaji acaniqui quepatsiqui cameetsanijite inquemisantamajajiaqueri iroajianaquenijite iriguintenijiaquempa ontaniqui imajirontagueti. Aritarite inquejetacaajiaquempari maasano pintsamajajiacarica, iriotaquetarite cantanquitsi. ⁶Cotanquitsi aviatimpajia mana poguipashiventajiaqueri teeca irajaarantajiguempaji, iriguenti pishineventajiaca ajaarantajiaatsica. ¿Teempaquate iriguenti catsimajiguimpica ajaarantajiaatsica nintsicaquate irashitacotacaantapinijiaquempiqueate santanaqui? ⁷Aviatimpajia pitsarotentajiacari Jesoquirishito piquemisantajiaqueritarite, cotanquitsi iriatimpajia iriguenti cantimanatirica cantatsica: “Caari.”

⁸Chooa otioncacotaca icanqueca Aapani Irioshi ora anaamajaguequeroca maasano cameetsamajatanquitsica, ocanti: “Pimpintsataquemparija pigonoro pinquejetacaajempa pipintstagueti aviatimpa.” Pinquemisantajiaquerogueti ocatica aisa pinetsanamajajiaquerogueti, cameetsamajataquequate. ⁹Cotanquitsi teegueti maasanojia pincavintsajajigueriji pigonorojia, manaqueate pantajiaque teeca oncameetsateji, teenicate pintsamajajigueroji icantaqueca Aapani Irioshi. ¹⁰Quericaca tsamajatiroca maasano itioncacotanqueca Moishishini cotanquitsi onchoocatimaqugueti aparo teeca irinetsanate,

iquempevaetaca, ari oquempetaca tee irinetsanateroji otsipapae. ¹¹Iriotaquetarite cantanquitsi Aapani Irioshi: “Aatoja poashitirotsi manquigarentsi”, aisa iriguentiqueate cantanquitsi: “Aatoja pimetojanti.” Irootaquequate quericaca aatogueti yoashivetaro manquigarentsi cotanquitsi irimetojantaqugueti, tee irinetsanatero icantica Aapani Irioshi, igantagatiraja iquempevaeta. ¹²Imaica aviatimpajia pinetsanamajajiaqueroja picanqueca aisa cameetsaja pinchoocamajajiaque. Aatogueti pinetsanata incatsimatimentajiaquempiro Quirishito oncoramanitapojajegueti, teenicate pinquemisantamajajigueroji Quenquetsatsarentsimajaca ovashiantacajaiacajiroca teeca oncameetsateji acoguishejiavetacaca. ¹³Aatoqueate icavintsajajajiri Quirishito oncoramanitapojajegueti maasano teeca incavintsajantajigueti, iriguentiqueate incavintsajajiaque maasano cavintsajantajiaatsica, aatoquea itsarajigui iriatimpajia oncoramanitapojajegueti incatsimatimentajiaquerigueti Quirishito quempevaejiatsica.

Arimajagueti aquemisantamajataqueri Aapani Irioshi, anteneri inintacaacajica

¹⁴Napiguemisantarijiateni, inchoocaquegueti cantavetanquitsineca: “Naatimpa naventacari Aapani Irioshi”, cotanquitsi aatogueti yantaguetaque cameetsaguetatsica, ¿arimpa amitacoshirenteri icantavetacaca intati? ¿Arimpate iro meshiashirenteri managueti incantashitaquempagueti intati: “Naventacari”? Aato. ¹⁵Ariguetiija pinejaqueri papiguemisantariteni tee onchoocateji inquitsaaquempaca jero aisa irishecaquempaca, ¹⁶iroompa pincantavetaquemparigueti intati: “Cameetsaquea pincantanajempa, pinquitsaatempa cameetsa aatoniji picatsincati, aisa pishecapintaquempa

cameetsa pinquemanaquempa”, cotanquitsiquea aatogueti pojocavaqueneri coguitejimotacarica, ¿arimpate picavintsajaqueri? ¹⁷Aritarite iquejetaca imaica cantatsica: “Naventacari Quirishito.” Teegueti irinetsanatero icantica Aapani Irioshi manaqueate iquemisantamampeaca intati, teequeate arimaja iraventamajatempari.

¹⁸Cotanquitsi arigueti incantajiquempi: “Aviatimpaqueate mana paventacari Aapani Irioshi intati, naatimpa nonetsanaqueroquea icanqueca”, cameetsaquequea. Aatogueti pinetsanaguetirotisi icantaqueca Aapani Irioshi ¿querocate ponigaanquenarocate arimaja paventacari? Naatimpa nonetsanaguetaqueroqueate icantaqueca irootaquequeate pitsatantajiacaca arimaja naventacari noquemisantaqueri. ¹⁹Aviatimpajia picantajiaque chooca apaniro Irioshimajaca. Cameetsaquequeate, cotanquitsi itsajiguiqueate ampatsini iriatimpajia chooca apaniro Irioshimajaca, irootaquequeate itsaroantajiacaca yompioncantajiacaca piompiompio. ²⁰Teequeate pintsatimajigueji aviatimpajia. Querica teeca irinetsanateroji icantaqueca Aapani Irioshi manaqueate iquemisantamampeaca intati. ²¹Pamenerija avaesatiniteni Averaameni arimajagueti iquemisanqueri Aapani Irioshi inetsanaqueroqueate icantaquerica. Pajinimequeate irimetojanaquerime Ishaaco aretarequi intaaquenerimequeate, icantantacaqueate Aapani Irioshi: “Imaica namaqueri Averaame quejetaca teeca inquempevaetimatempaji, inetsanaquerojarite nocantaquerica.” ²²Pameneri imaica Averaame teequeate apaniro inquemisanteriji Aapani Irioshi icanquerigueti: “Inchoocataque pinchoviquijianaqueca iroshequiamajatatiguenimaja”, inetsana-

taqueroqueate aisa icanquerica. Itsatantajitacarocaqueate arimaja iquemisanta-majataqueri. ²³Onetsanataca Itionca-caantaqueca Aapani Irioshi itioncacoji-querogueti ocanti: “Averaame iquemisanta-majataqueri Aapani Irioshi, irootaquequeate icantantacaqueate: ‘Namenaqueri Averaame quejetaca teeca inquempevaetimatempaji.’” Ariqueate icantajiqueri itsipataca Aapani Irioshi.

²⁴Pamenamajiaque imaica arigueti mana anquemisantamampeaquempari intati Aapani Irioshi, aatoqueate yamenajiaji quejetaca tee anquempevaetempaji, cotanquitsiqueate oraqueate aventajiacarigueti, aisa anetsanjiaquero-gueti icanqueca, irooqueate iroguenti yamenantajiacajica quejetaca tee anquempevaetimatempaji. ²⁵Ariqueate oquejetaca Iraava iroatimpa icotapinijia-avetaca yoashitapinijiguiro, cotanquitsi cameetsaqueate aajivaqueri omanajia-queriqueate itigarancajiaqueca Josoe amenanontaguequiteroneca oguinteni, ariqueate yamenaquero Aapani Irioshi quejetacaqueate tee onquempevaetem-paji. Ocamantajiaqueritarite aisa iroantajanajemparo otsipapoqui quenavoquirontsi irishiapitsajianaqueri-queate catsimajiaquerica. ²⁶Oraquea itsino caquinte, aatogueti ochoocantaro ishire, ompeaquempa, metojani oncantanaquempa. Ariqueate iquempe-taca teeca irinetsanamajateroji icantica Aapani Irioshi, ompeaquempaquea yaventavetarigueti.

Caavijisano oquempevaetacaanta anene

3 ¹Napiguemisanterijiateni, aato inchiquioji pishineventajigaro pintsatacaajiaqueri papiguemisanterijiateni, pitsajiaquetarite maasano naatimpajia tsatacaantajiguiroca Iguenquetsatsare Aapani Irioshi yamenamajiaque-

naqueate Aapani Irioshi, yamenajia-
 quena aricaca nonetsanamajajiaquero
 notsatacaantajiguica aricaca tee.
 Aatogueti nonetsanamajatiro naroguenti
 incatsimamajajiaque oncoramanitapoja-
 jegueti. ²Maasano aatimpajia aquempe-
 vaejiaca, cotanquitsi choocagueti teeca
 inquempevaetantemparo icanqueca
 ivagantequi, iriguenti caavijica icamee-
 tsati, itsamajataque icomajamajataca
 maasanotsino. ³Asatecaqueneri
 quitavaireri capichaji cavorejaquijita-
 tsica ivagantequi iroonijite inquemisan-
 tantaquempaca atinincacoquerigueti,
 ariquea oacaanaquerini maasanotsino
 querocagueti aninqueni. ⁴Ariqueate
 oquejetaca inirojegui quenajarontsi.
 Inirojeguivecaqueate aisa itampijague-
 vetanacaqueate tampija jeoc jeoc jeoc,
 cotanquitsi itaquiajatavaqueroqueate
 pataquitaquero ca itaquiajatantavacaro
 itaquiajatantajitaroca. Chaapataquija-
 niqui onavetaca cotanquitsi ivetincajan-
 tavacaro yoacotanaquequeate queroca-
 gueti inintaque iriatimpa. ⁵Ariqueate
 oquejetaca anene iroatimpa chaajani-
 quiqueate onavetaca, cotanquitsiqueate
 aquenquetsatantaguetacaros taaca
 opajitapae. Pameneroquea paamarija-
 niqui, chaamenquijaniquiqueate
 onavetaca, cotanquitsi agavejaquequea
 ontaaquero inirojegui mencoanentsi
 antsicanaquetarite. ⁶Ariquea ococa aisa
 anene, oquempetacaros paamari, caaviji
 oquempevaetacaajiacaji, ocovaetana-
 quero maasanotsino, otsitacaquero
 maasano antaguetaqueca acovaeguishe-
 tantacaca. Oquejetaca iroguenti camore-
 cari tsitacaquero ca anene.
⁷Aatimpajia agavejajiaque avirajia-
 quempari taaca ipajitapae canaagueta-
 tsica, araguetatsica, soancaguetatsica,
 jeri aisa choocaguetatsica ojaaquí.
 Agavejajiaqueri antsatacaajiaqueri.
⁸Cotanquitsi aatoqueate ichoocati

agavejanquitsineca intsatacaquero
 inene aatonijite iquenquetsatimati teeca
 oncameetsateji. Oraqueate ashecaji-
 guemparogueti quepigatatsica
 aatoqueate achoocajiaji, ametojajia-
 naque. Ariqueate oquejetaca anquen-
 quetsaguishejiguerogueti teeca
 oncameetsateji aatoqueate achoocajiaji
 cameetsa, ancatsimatavacaajiaquempa-
 queate intati. ⁹Aatimpajia amanajia-
 queri Amajirote Aapani atsaroventaji-
 jaari, cotanquitsiqueate irooqueate
 atsipatavaquero anijashijivajempari
 agonorolja ipeacaajiacaca iquejetacaaji-
 acaca iriatimpa. ¹⁰Oconoacaqueate
 aquenquetsajiaque manaqueate
 atsaroventajiacari Aapani Irioshi.
 Oconoaca aisa mana anijashijiacari
 agonorolja. Napiguemisantarijiateni,
 teequeate oncameetsateji anquejeja-
 quempagueti imaica. ¹¹¿Arimpate
 inejajitiro oraniqui ochovincajatigueti
 chovincajari ontsipajapojemparo
 cameetsajatatsica aisa quepishijatatsica?
 Teequeate irinejajiteroji onquejetempaji
 imaica. ¹²Aisa, napiguemisantarijiateni,
 ¿arimpate inejajitiro orivoitsoqui
 oraniqui ochoocatantaro iguera?
 Ariqueate oquejetaca igosovena
 ¿arimpate inejajitiro ochoocatantaro
 omantsa ova? Noncamantsijajimpi-
 queate aisa tee irinejajiteroji. Ari
 oquempetaca chovincajari cachojaa-
 majatanquitsica aato agaveja ompeana-
 jempa cameetsajatatsica. Ari anquemp-
 taquempa aatimpa, apaniro anquenque-
 tsate cameetsatanquitsica.

**Apaniroqueate Aapani Irioshi
 yagavejacaamajatacaji
 antsamajajiaquequeate**

¹³Choocagueti oraniqui tsatatsica
 quenquejatsica, iintsija incomajamaja-
 quempa, aisa incavintsajantamajata-
 queja, cotanquitsi aatoqueate yaventa-

cota cameetsaniji ironigaantaquempa arimaja itsamajataque. ¹⁴Cotanquitsiqueate pincatsimamajaquerigueti pignonoro pininquegueti panajiaqueri, aisa avisatigueti quenquejacotajatsi, aatoja pamataga pincanquegueti: “Notsamajati.” ¹⁵Teenicate irio quenquejacaguempirone Aapani Irioshi pinquejetaquempa imaica, inchiquiojitar piquenquejashicaro aviatimpa, aritarite icojiaca caquintepae, aisa iriguenti quenquejacaqueri ampatsini. ¹⁶Noncantajiaquempi querocaca ichoocajiaqueni catsimamajajianquitsica, aisa irisati quenquejacotajatsi, igantaga icatsimatavacaaca, aisa yantaguishejiaque taaca opajitapae teeca oncameetsateji. ¹⁷Cotanquitsi irira iquenquejacaamajataqueca Aapani Irioshi, icomajamajataca, cameetsaqueate ichoocaque, teequeate incatsimantateji, aisa iquenquejacojiaqueri itsipapae quero incoquempa incavintsajaquerigueti. Querica quenquetsatacaqueri iquemisantavaqueri. Ipintsatantamajata, icavintsajajiaqueri maasano. Aisa inetsanamajataquero icanqueca, teequeate iramatavijanteji. ¹⁸Taaca opajita apanquiti, aguero oitsoqui ashi. Aisa oquejetaca arigueti aguintenitaquempa cameetsa, agameetsantavacaquempagueti aatoniji acatsimatavacaga, ariqueca anetsanajianaquempa.

¿Taa opajita icatsimatimentantajitica?

4 ¹¿Quero ocotacani picatsimatavacaantajiacaca? Manatarite piquenquejaguishejiaque taaca opajitapae teeca oncameetsateji, irootaquequeate picatsimatavacaantajiacaca. ²Pinintajiavetaqueate pajaarantajiguempame, cotanquitsi teequeate pagavejajigueji, niganquiqueate pimetojavacaajanaca. Pashintsimanatsijiacari yashintajiacaca itsipa pamenajiaque tee pashintajiguem-

paroji, queroqueate pincojiaqueroni ariqueate picatsimatimentajianaquero. Teequeate pagavejajigueji pashintajiguemparo pinintajiavecaca, teenicate pamanajiajeriji Aapani Irioshi. ³Pamanajiavecarigueti teequeate irojocajiguempiroji, manatarite teenicatarite cameetsa pamanajigueriji. Manatarite pinintashijiavetaca pantajiaquemequeate taaca opajita pishineventajiacaca aviatimpajia. ⁴Manaqueate piquejejiacar manquigarentsi teeca apaniro ogueriji omanquigare. ¿Arimpate tee pintsajigueji pishineventajijajemparguati inintaguishejiaqueca quepatsiquitica manaqueate pisemaneguintajiacari Aapani Irioshi? Nocamantajiaquempica quericaca shineventaquemparone inintaguishejiaqueca quepatsiquitica manaqueate icatsimajiaqueri Aapani Irioshi. ⁵Teenicate oncanteroji intati Tioncarensimajaca ocantigueti: “Irraqueate Ishire Aapani Irioshi choocashirentajiaquempica inintamajataque pimpintsamajajiaquempari apaniro poamajatanakeri.” ⁶Cotanquitsi Aapani Irioshi icavintsajajiacaji yamitacojiacaji antampishitashitantajiaquemparoca aatonijite ashineventajigarotsi teeca oncameetsateji yantaguishejitica. Aritari ocanque itioncacojiueca: “Aapani Irioshi tee irishineventempariji aventacotatsica, cotanquitsi irira teeca iraventacotempajiiroqueate iriguenti icavintsajajiaque yamitacojiaqueri.”

⁷Nocantantajiaquempicaqueate pinquemisantamajajiaquerija Aapani Irioshi pinetsanamajajiaquero icanqueca. Pintampishitashijiaqueri ampatsini aatoja piquemisantajiguiri. Pinquejejiacquempagueti imaica irishiapanajante. ⁸Pinquempejijiaipojaquemparija Aapani Irioshi, ariqueate inquempejijiaipojaquempiquea aviatim-

pajia. Nocantajiaquempi aviatimpajia antaguishejiguiroca teeca oncameetsateji, povashiantajianajero, aato papijijiajiro aisa. Aviatimpajia quemisantamampeajitsica pinetsanamajajiguempa aatonijite pantaguishejiajiro teeca oncameetsateji. ⁹Pishimampoanajiguempa, pirajaiguempa, pamenajiguempa queate mana pantaguishejiaque teeca oncameetsateji. Aviatimpajia shirontajitsica pirajaiguempa, aisa aviatimpajia shinejianquitsica pishimampoanajiguempa. ¹⁰Aatoja paventacojija manaqueate pincantajiaqueri Amajirote: “Pamenaquena aviatimpa teequeate naatimpa nagavejempaji.” Pinquejetaquerogueti imaica iriatimpa iragavejacaquempiqueate.

¹¹Napiguemisantarijiateni, aatoqueate pinijashinatantajijaatsi, pitsajiaquetarite ocanque Iguenquetsatsare Aapani Irioshi pimpintsatavacaamajajiaquempaja, cotanquitsi quericaca nijashinacarica igonoro irooca icanti: “Chooca yantaqueca”, teequea irinetsanateroji Iguenquetsatsare Aapani Irioshi, quejevaeata manaca injashinatacaro intati icanque: “Tee oncameetsateji Iguenquetsatsare Aapani Irioshi, aatoqueate nonetsanatiro ocantaqueca.” ¹²Apaniro icanca tigarancacajiroca Iguenquetsatsare, apaniro iriatimpa iriguenti Joese cantanquitsineca oncoramanitapojajeguetti querica quempevaetanquitsica, aisa querica teeca inquempevaetempaji, apanirotari iriatimpa yagavejajue irimeshiantaque, aisa incatsimamentajiaqueri quempevaejiatsica. Aviatimpa, ¿quero ocotacani picantacotantacarica pigonoro tee incameetsateji?

Icamantajiaqueriqueate pimantajiaatsica jerijia aisa ajaarantajiaatsica

¹³Pinquemisantajiguena aviatimpajia cantajiaatsica: “Imaica, aricampa

osaitequera oajianaque osamani, aguintenijiaquiteempa apaniro ajagantsi, ampimantajiaquitequeate, aajigueta caquisequipae imentaquipae.”

¹⁴Teequeate pintsateji taaca oajiaquempine osaitequera. Manatarite piquejejiacaro mararo omararosecanquiti iroompaqueate taampina osaamencorencaguitetanaji. ¹⁵Iroguenti nintanquitsine Aapani Irioshi anchoocajiaque antajiaquero aquenquejaguetaqueca.” ¹⁶Cotanquitsi aviatimpajia manaqueate paventacojijica piquemacaantajia. Naatimpa noncantajiaquempi tee oncameetsateji pinquejejiakerogueti imaica. ¹⁷Iriorqueate tsavetanquitsica taa opajita ininqueca Aapani Irioshi iroompa tee irinetsanateroji, manaqueate iquempevaetaca.

Iquenquejacaajiaqueriqueate ajaarantajiaatsica

5 ¹Imaica noncamantajiaquempi aviatimpajia ajaarantajiaatsica. Pirajaiguempa aa aa, pincajemajiaque pantsipejiaquempatarite coajica. ²Maasano pashintajiavetaca aatonica ocameetsatanaji. Aisa piitsaarepae irishecataquemparo shecaguetaroca quitsaarentsi. ³Iriorqueate pigavorejari tepae aisa pimentaquitsitepae incantaiteguetanaquempa, aato ivegarataja. Incantaitetanaquempaguetti intajiaquempi picapiocashicari intati. Irootaque atsipetacaantajiaquempineca, onquempetaquempa onteroncaquero paamari piteshi, picapiocajiaqueritarite pimentaquitsitepae pajiniguetti aapojempa savincaguiteri vegaratopajaatsineca. ⁴Teenicate pivegaramajiagueriji antimojiguimpica manaqueate pamatavijajiaqueri intati, irootaqueate iriatimpajia imaica inquenquejacojiajero teeca pivegarajiagueriji. Iriira

Agavejamajatatsica Imajirojiate caramirincajatsica iquemajiaqueriqueate antimojiguimpica yamanaquerigueti. ⁵Pajaarantavaejiaca taaca opajitapae acaniqui quepatsiqui. Manaqueate pisavicaventajianaquero pishineventajiacaca aviatimpajia. Manaqueate piquejejiacari viratsi itijaitica iriguejintajiqueriqueate irishecajitaquempariqueate, interoncajiaquemparitarite Aapani Irioshi coajica intigarancajiaquempi camorecariqui. ⁶Pitsojeventajiacaritarite netsanajiatsica pimetojacaantajiaqueri. Iriatimpajia teequeate impigamentajianaquempari.

Pagamajavajemparija Amajirote

⁷Imaica, napiguemisanterijiateni, noncantajiaquempiqueate picancanija pantsiperejacojiaquempa irosati incoraquetajegueti Amajirote. Pinquejejiacquemparija panquitatsica teequeate incatimateroji iraguero ivanquire, manaqueate yoguijvaquero ajagantsitanajigueti osampamajanaqueta ariqueate iraaquero. ⁸Ariqueate pinquejejiacquempa aviatimpajia pinquemisan-tacojiaquempa, aatoja piperajiga. Arimpaqueate pintampishimajajianaque pinquemisantamajajianaquequeate, pajinitarite incoraquetaje Amajirote. ⁹Napiguemisanterijiateni, aatoja pinijashitavacaajiga aatoniji icatsimati-mentajiapojimpro. Catipojacatari sotomorontsiqui irira Joese cantanquitsineca quero incojitaquerini maasano caquinte. ¹⁰Napiguemisanterijiateni, pinquejejiacquempariqueate tsavetantajiguironica icanquerica Aapani Irioshi coramani, iquemisantacovaejiacaqueate yatsipeventajiacarigueti. ¹¹Imaica pitsajiaque ishinevaejiaca maasano quemisantacojiatsica yatsipetacaajiacarigueti catsimajiaquerica. Piquemacojia-queritarite Jopeni coramani iquemisan-

tacocaqueate, teequeate irovashiantana-queri Aapani Irioshi, arimpaqueate ijatanaqueri iquemisantamajatanaqueri. Ariqueate icavintsajaqueri Aapani Irioshi arimpaqueate yojocamajataque-neri anaamajataqueroqueate iroqueti-nica yashintaveca. Caavijitarite icavintsajantamajati Aapani Irioshi, aisa ipintsatantamajata.

Aatoqueate picantashivijita

¹²Imaica, pinquemisanterijiateni, pinquemisantamajajiaquena noncantajia-queempica. Pincantamajajiaquejate, aatoja pamataajiga, aato picantashita: “Yamenaquenatarite Aapani Irioshi teequeate namataimatempaji.” Aato picantajigui: “Arigueti namataaca ontsinacaquena inquite.” Ariqueate oquejetaca aisa aato picantajigui: “Arigueti namataaca ontijaquena quepatsi.” Manaqueate pincantajiaque: “Jeeje arimaja”, irooca manaqueate pincantajiaque: “Teequea”, aatonijite icatsimatimentimpro Aapani Irioshi coajica.

Pamaneri Aapani Irioshi

¹³Choocagueti atsipetanquitsica iramanaqueri Aapani Irioshi. Irraqueate shinemajanquitsica iramashaiventaque-ri. ¹⁴Choocagueti ashinoncajanquitsica incajemajiaqueriqueate quempo-guijajiguirica quemisantajiatatsica iramanacoventajiapojiaqueriqueate, aisa impantantajiaquempariqueate oreji ivajiroqui Amajirote. ¹⁵Iramanacoventajiaqueririgueti intsamajajiaque arimaja iquemisan-tavaqueri Amajirote. Inqueje-taquempagueti imaica ariqueate irogueshitajeri ashinoncajanquitsica, aisa irishemajaquero maasano iguempvaere irimaisantajeneri. ¹⁶Irootaque-quea nocantantajiaquempari pinquem-vevaejiacquempagueti pincamantajiaque-

riqueate papiguemisantarijiateni, aisa pamanacoventavacaajiaquem-pajate cameetsanijite intampishitacaajiaquem-pinijite Amajirote pincomajamajajia-quempaja, aisa irogueshitimentajiajem-pinijite pashinoncajajiacagueti. Iriraqueate quemisantamajatirica Aapani Irioshi yamanaquerigueti, oshequi agavejaque. ¹⁷Pamenerija Iriashini, irira tsvetantirinica Aapani Irioshi coramani, iquejemajajiacaji aatimpajia, cotanquitsi yamanaquerigueti Aapani Irioshi icantaquerigueti aatoja otejajitsi incani ariqueate tee ontejajeji irosati yaapojajagueti 42 taai.

¹⁸Ariqueate yamanajiri aisa icantajiri ontejapojaje incani, ariqueate otejapojaji, ariqueate otsoroaguetanaji ishecajia maasano.

¹⁹⁻²⁰Napiguemisantarijiateni, pintsamajajiguero ocatica noncantajia-quempica. Choocagueti quempevaetan-quitsica quemisantavetacaroca Quenquetsatsarensimajaca, arigueti iramitacotaqueri itsipa irinetsanatana-jempanijite, manaqueate yamitacota-queri aatonijite inejajiro imetojane, irimeshiaqueritari Aapani Irioshi irimaisantsitajeri maasano yantaguishevetacaca oshequiavaevetanquitsica.